

# 61 · 中孚

《序卦》曰：节而信之，故受之以中孚。

## 风 泽

中孚：

豚鱼吉。

利涉大川。

利贞。

《象》曰：中孚，柔在内而刚得中，说而巽乎，

乃化邦也。

豚鱼吉：信及豚鱼也。

荀爽曰：豚鱼，谓四、三也。艮为山陆，豚所处。三为兑泽，鱼所在。豚者卑贱，鱼者幽隐，中信之道，皆及之矣。

利涉大川，乘木舟虚也。

中孚以利贞，乃应乎天也。

《象》曰：泽上有风，中孚。

君子以议狱缓死。

初九：虞吉，有它不燕。

荀爽曰：虞，安也。初应于四，宜自安虞；无意于四，则吉。故曰“虞吉”也。四者承五，有它意于四，则不安，故曰“有它不燕”也。

《象》曰：初九虞吉，志未变也。

荀爽曰：初位潜藏，未得变而应四也。

九二：鸣鹤在阴，其子和之，我有好爵，吾与尔靡之。

《象》曰：其子和之，中心愿也。

六三：得敌，或鼓或罢，或泣或歌。

荀爽曰：三四俱阴，故称“得”也。四得位，有位。故鼓而歌。三失位，无实。故罢而泣之也。

《象》曰：或鼓或罢，位不当也。

六四：月几望，马匹亡，无咎。

《象》曰：马匹亡，绝类上也。

九五：有孚挛如，无咎。

《象》曰：有孚挛如，位正当也。

上九：翰音登于天，贞凶。

《象》曰：翰音登于天，何可长也。

《序卦》曰：有其信者必行之，故受之以小过。